

審看擬式卷一

蠹役詐贓擬軍脫逃自首遇

赦不准留養

該某縣知縣某審看得軍犯池壽在配脫逃自首並請留養一案緣池壽籍隸卑縣曾充縣署快役於某年月日因索詐縣民吳謂得贓犯案審依蠹役恐嚇索詐貧民者計贓十兩以上發近邊充軍刺發某省某縣安置於某年月日到配經該縣將該犯折責發交鄉約張四管束至某年月日池壽因配所貧難復思母老無依卽乘閒脫逃經該鄉約張四報經某縣訊供詳緝限滿未獲擬議詳參某月日池壽逃回家內慮被拏獲從重問罪旋卽自行赴案投首經卑縣訊供通詳奉批飭審遵提覆鞫據供前情不諱逃後詰無另犯不法及知情容留人家配所鄉約亦無賄縱情弊案無遁飾查例載充軍常犯至配脫逃初次枷號一箇月本犯近邊者以次遞加又蠹役詐贓十兩以上者

東京大學
東洋文化研究所所藏
漢籍善本全文影像資料庫

書名 審看擬式四卷首一卷
撰者 清 剛毅 撰，清 葛士達 撰附
卷 卷首
內容分類 史-政書-法令-律學
索書號 大木-法類-獄訟-斷獄-10
編號 B3841100

[彩色首頁1](#)



[東洋文化研究所漢籍目錄](#) 編號: B3841100

[東洋文化研究所漢籍目錄所藏漢籍善本全文影像資料庫](#) 索書號: 大木-法類-獄訟-斷獄-10

[漢籍善本全文影像資料庫](#) 文本 [審看擬式四卷首一卷](#)

版權所有: [東京大學](#) [東洋文化研究所](#)

[使用上的注意事項](#)





審看擬式



光緒壬辰秋仲
刊于粵東書局

自序

三代曰上月吉始和懸書象魏鄉黨率民讀法其士之入大學者於修齊平治而外兼及訊囚執馘之事其教之也備其習之也豫故其出而仕也執法斷獄取懷而予無事假手於人近世溺於制舉帖括之業苟且簡陋於律令格式每多闕焉不講閒有博學多聞者亦且鄙爲申韓家言不屑措意一委之於幕客吏胥據案書判不知牘中爲何事一獄到官幕不動筆悚息俟之累日彌月不得申詳致使書役需索招搖百姓破家蕩產下結民怨上傷天譴嗟夫刑獄者生民之大命也銖黍輕重之間求之不詳講之不審卽誤殺人矧曰懵然無知儼臨民上而閭閻之疾苦圖土之冤抑詎有底哉予供職西曹十有五年由監司洊陟封圻數年以來周歷南北數行省接見僚屬每諄諄勸曰愛民盡職其中不無可造之材向上之志特囿於積習相沿



成俗一若刑名一事非居官者所能習知夫居官之道原不專恃刑名然死者不可復生斷者不可復續從政者之所宜熟思案處孰有亟於是哉舜典周誥兢兢於恤刑敬獄孔子云刑罰不中則民無所措手足爲民上而於此漫不經意其餘尙可問哉古來大儒如叔孫通爲律旁章鄭康成馬融杜預咸爲律章句王伯厚箋釋律母八字莫不致精於律學古語云讀書不讀律致君堯舜終無術其闕焉不講與夫鄙而不屑者殆未知夫治術之本原也子旣慨吏治之積唐刑政之草率小民無知觸法冤沈而莫告也會以昔年所編秋讞緝要兩次刊行比較實緩可矜示以定獄之準則復將各衙門公牘程式彙刊爲牧令須知廣印分贈埝於所至之處設課吏館日與僚屬切磋問難擬題考試隨事指點比年來同官亦漸知比律折獄之大意惟念獄訟之情偽出入始於州縣成於司院定於刑部州縣審看

不當解司申院達部而後即使駁議平反而民之拖累含冤者已自不淺况文致增減是非淆亂而莫由譏詰者正復無限則州縣之案看其所關尤重也茲擇晉陽課吏館中所擬州縣案看各案計八十餘則再三刪核付諸手民情節形勢攸列貴乎簡明援律比擬輕重酌平情理命盜奸偽按律分目命之曰審看擬式以示同官雖案情之變幻百出原難膠柱以求而敘斷程式各種略備譬之爲室屋壁戶牖規模具存其中陳設器具稱其家之貧富以意安置自可不至顛倒爲牧令者人置一編再參以秋讞緝要諸書斟酌而變通之治獄庶有眉目不至仰視幕胥之鼻息而官能自主獄無滯留或亦佐治之一端乎光緒十有八年歲在元默執徐秋仲撫粵使者札庫木他塔拉氏剛毅序竝書



爭繼

一則

盜賣田宅

一則

強占良家妻女

二則

販運私鹽

一則

因竊乘匿原典貨物

一則

費用受寄財產

一則

禮律

左道惑眾

二則

匿父母喪

二則

兵律

刁徒假地方公事逼勒平民聚眾

一則

私藏應禁軍器

二則

卷二

刑律

監守自盜倉庫錢糧

一則

強盜

二則

捕役分贓通賊

一則

奪犯毆差

二則

饑民爬搶

二則

搶奪拒捕

二則

搶奪私鹽

二則

竊盜三犯

一則

捕役勾通竊賊坐地分贓

一則

盜田野穀麥

一則

兇惡棍徒

二則

姦拐同逃

二則



誘賣功服卑幼

二則

發塚

二則

卷三

刑律

謀殺

一則

採生折割人

一則

支解活人

一則

鬪殺

二則

故殺

一則

戲殺

一則

誤殺

一則

過失殺

一則

過失傷

一則

因事用強毆打威逼致死傷非致命又非重傷

二則

違犯教令致母氣忿輕生自盡

二則

繼母故殺子

二則

刁徒直入衙門挾制官吏

一則

投匿名文書告言人罪

一則

誣告人死罪未決

一則

誣告笞罪

一則

卷四

刑律

恃婦逞刁屢次翻控

一則

繼母呈送忤逆

一則

義父呈送忤逆

一則



長隨詐贓斃命

一則

偽造印信

一則

詐為官文書

一則

書吏詐為州縣衙門文書誑騙財物

一則

銷燬制錢

一則

詐稱內使等官

一則

刁姦

二則

輪姦

一則

雞姦

一則

冒姦

一則

買休賣休

二則

賣空買空

二則

挾仇放火

一則

誤禁平人因而致死

一則

卷末

附審看論略

十則



如同盜倉庫之人內有監守者商同常人偷竊其有監守之責者以監守論常人幫同者以常人盜論事涉典守取捨由已為監守盜財物在官乘閒

竊取為常人盜

律有各盡本法者如三人共謀為竊盜二人入室或拒捕或姦其一人在外並未知情下手則各盡本法科之又如五人私越度關或避役在逃雖係一家各科以度越在逃之罪不分首從又如一人兼犯兩罪發非同時則通計前罪以充後數即如一罪一徒三年一徒二年徒二年之罪到配已經一年其徒三年罪又發覺再著充徒二年通計前罪一年以充後罪三年之數是或到官決罪後另犯罪者則另科其罪是也律有仍盡本法者如姦拐之犯罪未發而自首免其拐逃之罪而名例姦不准首仍盡犯姦之法科之搶奪拒捕鐵尺傷人未發自首免其搶奪拒捕之因而鐵尺傷人係屬侵損於人無因可免則仍按鐵器傷人之法科之

律有言罪止者謂其罪止於此不必再加也凡言罪止者重不

過流三千里皆不入於死也

律有言止據見獲者所以防誣扳也如犯姦以確據為坐私鹽以人鹽並獲為坐賭博以現發者為坐是也

律有言勿論者勿論與不坐相似而不同也勿論者情有可原事出倉卒可勿深論也如夜無故入人家強盜拒捕登時格殺勿論之類不坐者律有應得之罪而理得勿科如以財行求與受本應同科抑勒詐取者與財人及說事過錢人俱不坐蓋由不得已也又如投匿名詞帖告言人罪被告言者雖實不坐以遏刁風也又有言免罪者其人本有應得之罪或以功相抵或事可從寬遂免其罪此無定例者也

律有以某律論准某律論以者所犯雖非此律而情事實同准者所犯情事不同而跡實相似用此准彼之意也日以者實指



之詞曰准者斟酌之詞故律言以者至死罪不減等言准者至死減一等罪止滿流

律有罪同者同罪者罪同言人雖不同而厥罪惟均也故至死不減等同罪是同有其罪也雖坐其罪仍以輕重別之故至死減一等惟受財故縱同罪全科至死者絞

律有併贓論罪者併贓者如監守盜常人盜倉庫錢糧計贓銀百兩無論每人所分多寡及節次所盜凡係一時俱發者各人均按百兩之贓科罪不分首從竊盜贓亦併贓論罪然以一主為重如偷竊數家財物多寡不一計其贓多之一主無論人數多寡每人分得若干以一主所得贓併計科罪而不合節次所盜之贓全科為從減一等蓋公物重於私家也

律有計贓論者是計其贓數而不併計其人各科各罪如照枉法贓計各主者通算全科如不枉法贓計各主者折半科罪枉法者受財違法納賄欺公也不枉法者雖受其財未違其法也律有坐贓論者與者無所求受者無所為本非贓而以贓坐其罪也計各主者通算折半科罪與者減受者五等

律有分有故無故者有事故而無心犯此者情有可原無事故而有意犯此者法有難恕即如無故不朝參公座無故向城市及有人居止宅舍放彈射箭投石之類是也

律有分知情不知情者如他人犯法舞弊而此人知其所為者則是知情不知其所為者則是不知情如知情者照例科以應得之罪其不知情者分別有無失察處分

律有分已施行未施行者此指事而言猶如已成未成也如公事錯誤及事有增減已行者罪重未行者罪輕

律有分雜犯實犯者雜犯止有此罪之名而不實決實犯則照律的決其罪如雜犯斬絞皆准徒五年雜犯軍流皆總徒四年



止有斬絞軍流之虛名並非實決其斬絞軍流之罪也
律寬於初犯而嚴於再犯凡初次犯罪者除犯姦及傷損於人
不准自首外餘俱准其投首又如初次犯罪情有可原者老小
廢疾及婦女俱准收贖自首若再犯則概不准孤子留養亦准
一次之類是也
律於婦人犯罪無概行收贖之法婦人犯罪律應收贖者方准
收贖如毆差闕堂及姦謀誘拐等案罪在軍流以上者實發駐
防爲奴又如本省已結之案疊次翻控審虛復行叩 闈妄控
者治以應得之罪不准收贖

諭命案

夫以陰謀秘計人不及防致人於死者則爲謀殺同謀爲從下
手則爲加功謀殺起衅不外姦盜仇三項因姦而謀或在成姦
之後或窺其人之妻少艾殺其夫以圖婚娶或由爭姦妒姦挾
仇必須研究明確因盜而謀或在孤村曠野或在昏夜之時見
證無人必須起獲贓物因仇而謀當有積怨深仇難容難忍情
事必須供詞切確方成信讞若疊毆重傷倒地而又狠打迭扎
立時致斃者則爲故殺謀殺蓄念於未殺之先故殺起意於毆
打之際或憶及夙嫌或畏其報復在兄弟或利其貲財或因其
不法在夫妻或恨其妒悍或因其不順此皆臨時逞忿起意也
若彼此爭吵互相搏擊有爭鬪之情有互毆之狀素無嫌怨亦
無致死之心者則爲鬪殺若先有爭端業已分散復圖毆打洩
忿者則爲謀毆商諸他人同往幫助者則爲同謀其毆不過意

圖洩忿並非有心致死故仍以鬪殺擬罪秋審略爲加嚴若本無爭鬪之心亦無爭鬪之事偶將堪以殺人之事爲戲而致斃者則爲戲殺其因戲謔而致爭角致死者仍以鬪殺論若因毆彼而傷此欲殺此而害彼者則爲誤殺各按鬪故論罪若耳目所不及思慮所不到偶以致死者則爲過失殺如耳目雖不及而思慮所可到者另有律例如車馬殺傷人之類若因罪人拒捕登時致斃者則爲格殺若罪人已經就拘而致死者則爲擅殺格殺擅殺案情不一必須訊明死者所犯何罪如何拒捕是旣應捕兇手有無應捕之責若威力制縛拷打監禁致死者情節各有不同有無故擾害譌詐欺壓良民形同光棍者有死近罪人縛禁並未毆傷本不致於斃命其死由於凍餓及別故者當衡情擬斷若威逼致死者必須有可畏之威強弱不敵之狀無此卽防藉屍圖賴若自盡命案情節各別有畏罪而死者有

愁急而死者有氣忿而死者有病纏而死者先須究訊來控起衅之由再傳屍屬訊辨以防藉端生波

論盜案

律載公取竊取皆爲盜是統強劫偷竊等類而言也夫明目張膽撞門搜劫者則爲強盜潛踪隱跡取恐人知者則爲竊盜竊取賊已入手事主驚覺追捕情急圖脫還毆者則爲臨時拒捕若賊未入手事主驚覺膽敢按捺打傷嚇禁聲張公然攫取者則爲臨時行強若已離盜所拒捕當分別有無護賊護夥及情急圖脫各情定擬若在途中見人負持財物乘閒奪取奔逸者則爲搶奪若見人財物喝阻不從先將事主按捺或毆打肆兇公然攫取者則爲強劫強劫與搶奪事雖相似情則不同辦案不可不察強劫事不常見每有竊賊臨時拒捕而事主氣忿報稱夥劫者有在途搶奪拒捕而錯認強劫者有互鬪因而入室

毀棄而輒稱劫掠者有隱匿他人財物或遺失官物捏報盜去者有土豪惡棍平空訛詐藉端誑報者有在家殺人屍難掩藏而捏報是賊者有捕役拷打逼認者有指竊為強者有挾仇誣扳者審理盜案必須逐一推求以免枉陷無辜

論姦情

若本夫與父母不知情姦夫姦婦苟合成姦者則為和姦若本夫與父母知情而不禁者則為縱姦若婦女不願而本夫與父母強令勉從者則為抑勒通姦若本夫與父母希圖姦夫資財而婦女亦樂從者則為賣姦若姦夫眾多往來肆無忌憚者則為士妓若攜帶婦女各處賣姦者則為流娼若見人行姦挾制宣淫者則為刁姦若男姦男者則為雞姦若有強暴之狀婦女掙不得脫之情者則為強姦強姦必致損傷膚體毀裂衣服及鄰證見聞方是否則有諱和為強以圖掩飾者有先已通姦後



悔拒絕而姦夫逼勒續舊者有先與甲姦後與乙姦受乙拒甲而指稱強者有本夫縱姦商謀誑詐者有淫婦調戲男子拒絕反以調姦強姦誣指者亦有姦匪串通書差詐強為和者姦案變態不可不察也

論雜案

略人略賣人雖有律例而和誘略誘必當分晰夫設方用計而被誘之人不知者則為略誘若此投彼合各出情願者則為和誘若誘拐十歲以下幼孩及女子者雖和亦為略誘若婦女起意央求帶往同逃者則為背夫私逃無姦不得以和誘論若婦女背逃收為妻妾者以收留在逃律論拐逃與收留不同又有買休賣休本夫藏踪匿跡改名換姓既賣之後出而捏控拐帶私逃者不可不察

若知人有財物寄於他處詐言欺飾以取之或合本營謀捏稱

折耗而侵吞之或受寄人財物詐稱被盜而欺藏之者皆爲詐欺取財若平空譎賴或捏稱欲控欲毆或藉端嚇詐其人不得已而與錢息事者皆爲恐嚇取財若向人謊言借貸本利不償或費用人寄物則另有律例蓋詐欺取財者乃巧言哄之設局誘之使人墮其術中其心固屬可誅亦當論其出財之人有無貪利圖謀之心衡情擬斷又如拐帶人財物者乃乘便攜帶私逃遠颺之類若侵欺那用並未逃走則非拐帶矣若控盜砍墳樹必須驗明所砍之樹距墳遠近附墳近旁之樹則照例辨罪遠則非墳樹論也若控爭墳山界址異姓以印契糧串爲憑同姓以譜牒議約爲憑

論敘供

作文代聖賢立言敘供代庸俗達意詞雖粗淺而前後層次起承轉合理伏照應點題過脈消納補幹運筆布局之法與作文無異其線索要清先敘地保次隣證又次輕罪人犯末則最重犯供辦案又須提綱挈領一人之供如此眾人供亦僉同一人情節逼真眾人詞氣符合線索既清案無紊亂任其犯之多事之雜或簡或備總要如一線串成異口同聲但執筆者精神不到照應不及恐有參差當擇案中重犯或要證訊明將全案情節於此人供內逐層敘出作爲通案眉目餘照此供簡該順敘其有不同處略爲改易分而視之詞不重複合而觀之理無參差儼若天衣無縫此卽前後層次也情節要明情者兩造起衅之由節者此事前後之序此事因何而起中間如何轉折末尾如何而止當日意欲何爲人之情也彼此交會景象事之形也

審看辨式 卷首
以一事之情節參各人之情形從頭至尾挨順而來並無顛倒遺漏繁冗此即起承轉合也來路要顯如從前並無此人後忽添出蓋添出者非要犯即要證必將如何推求如何訪察隨即傳案之處供內補出或於他處點明方不突如其來又如要犯先不肯招或遽然直認似有可疑必須先於隣證供內預為根據則本犯招認始為可信又如報詞屍傷及敘勘情形於各人供內層層照應不相違悖及案內地名姓氏人喊多寡他物手足名目均須畫一此即埋伏照應也至於點題過脈要清如命案屍傷註明委係因何身死是驗傷之點題也供內敘明某人實係小的因何而毆並非有心致死或挾嫌致斃是訊供之點題也如兇犯盜犯久已脫逃前官審結後官續獲訊報當將全案緣由敘過現案又如承緝展參案件前官限內離任後官接緝文內應將前官幾時因何離任後官捕限未滿敘明凡文內

應敘前官者應寫姓名不應只寫某令某牧上司則敘明衙門某姓不可只云某憲年分月日亦須寫明不可用本年本月字樣來踪去跡聲敘明白此即案中過脈也串供宜省易不官衍敘閒語及零星問答證佐多人只敘一人之供餘寫供同無關緊要之供以一語數字該括過去證佐互異之詞訊明更正不宜兩歧犯名互異及有混名乳名亦須確訊的名以免影射如覆審証佐與原供無異者只敘遵即覆訊除某某等供與初審無異不復重敘外或有應質證者仍敘其正犯除年歲籍貫與初審無異省敘外只敘案情之供此即消納之法也如案有情節未明加以詰問敘回答之供如猶未明再加一問不可遺漏繁冗如案可推進一層並防別有所犯其有無知情容留窩藏等類均須逐一補敘或於供尾聲明此即補幹之法也布局運筆乃辦案之要訣布局者籌算通案之去留向背安排眾人之

線索貫接緊而不慢整而無遺運筆者字字無間句句有骨爽暢而不糾纏老辣而不游移作文以題目為主敘供以律例為主案一到手覈其情節何處更重應引何律何例猶如講求此章書旨重在何句此句題旨又重在何字也若供勘不符情節不當牽扯案外繁冗干礙別條律例何異虛題犯實典題犯枯漏下連上之文耶

敘供法

罪人口供先敘籍貫年歲並有無父母兄弟妻子如只有父母而無兄弟子姪當敘父母年歲蓋有籍貫則知其來歷有年歲則知其老幼強弱有無兄弟子姪則知其是否獨子有父母年歲則知其是否親老至親老丁單之案除謀故重情不準留養其闕誤戲殺情輕等案近有隨本聲請者到案即應訊明有無父母祖父母是否老疾該犯是否獨子如其父故母存並無兄弟應訊伊父係何年身故伊母是否守節現在若干年歲其被殺之人有無父母即無父母是否獨子亦應訊明均取具隣佑族長供結以憑秋審覈辦即遣軍流徒等犯亦應如此訊明不可疏漏若問一人必將此係何色人敘明如地保即敘地保某人供云所供是實餘仿此有職人員即敘職員舉監生貢各就本分稱敘如係武舉武生亦應敘明至平民則稱小的婦人



則稱小婦人女子稱小女子供某人之妻某人之母必須寫出某氏如有親有服者亦須敘明何親何服犯人之名有與聖賢及上司同名或與廟諱同音者皆當改寫鄉俚夷苗土字不載字典者照音改正其一切混名排行易於牽混總應敘出某卽某人其未獲另結人犯應逐一點出切不可只稱某等緝獲另結如生監犯罪訊明人學年分捐納事例如前已革除敘因何案由僧道犯罪敘出俗家姓氏及何項僧道曾否請有牒照至於供內稱老爺天票等字樣改寫台前案下敘供不宜太文句句要像俗話又不可似乎小說如罵人污辱俗話及犯姦污穢情事不宜直敘只以混罵成姦等字該括可也供詞臨定須加詰問如鬪毆者詰其有無起衅別故及在場幫毆之人是否有心致死自盡者詰其有無威逼之人謀殺者詰其夙怨舊仇因何結成有無同謀加功殺姦者詰其從前有無縱姦情事盜案



詰其有無窩夥及劫竊別案脫逃後獲者詰其逃後有無知情容留之人及有無爲匪不法之類如有供非落膝而卽招認或落膝供真而事可疑者皆須加用詰語以免疑惑又有刁健之徒層層剖辨應隨詞駁詰照供實敘以防翻控再翻控之案不同有刁徒健訟者有鄉愚無知及痛親情切者如刁徒訟棍則當照例反坐否則辦理有三法一懷疑妄控一事出有因一誤聽人言惟在隨事斟酌至病瘋人犯之供必須含糊錯落似是而非所對非所問或有問而無供亦有時發時止臨審供吐明自者若頭緒清楚反生疑惑亦不可故意捏飾若啞子犯案無供可敘惟詰以手指頭點神狀敘入稿內敘供總要盡情盡理詳而不煩簡而不略一切無關案情之語均不必敘有關罪名之言不可含混犯供情形要與理合情者起事之初形者作事之狀如盜案起意謀劫謀竊謂之情如何上盜行劫行竊搜賊

出入謂之形因何為盜或迫於飢寒或涎其富饒謂之理情真
理當形切無疑方成信讞惟小民生長草野習於顛蒙以無知
而罹罪戾者居多

朝廷

立法不得不嚴我輩行法不得不恕但有一線可寬須存慈祥
之念傳曰宥過無大罪疑惟輕與其殺不辜甯失不經此皆好
生之心也欲救其人亦要敘出一番可矜道理不可左遮右掩
支離牽合反因弄成重案敘供之法不可不知也

右律義各條輯註集解各編及刑部說帖歷年刑案已各論
之詳矣惟律書精微奧衍目類繁賾即向號專家之學猶苦
展卷茫然粹難通貫其論說之散見各條下者臨時尤不易
檢尋茲擇其大要逐條拈出並取牧令須知內所論敘供之
法二則彙列於審看擬式之卷首庶閱者了然於治獄不無
小補



子良氏識

審看擬式卷首終

審看擬式卷一

蠹役詐贓擬軍脫逃自首遇 赦不准留養

該某縣知縣某審看得軍犯池壽在配脫逃自首並請留養一案緣池壽籍隸 卑縣會充縣署快役於某年月日因索詐縣民吳謂得贓犯案審依蠹役恐嚇索詐貧民者計贓十兩以上發近邊充軍刺發某省某縣安置於某年月日到配經該縣將該犯折責發交鄉約張四管束至某年月日池壽因配所貧難復思母老無依即乘閒脫逃經該鄉約張四報經某縣訊供詳緝限滿未獲擬議詳參某月日池壽逃回家內慮被拏獲從重問罪旋即自行赴案投首經 卑縣訊供通詳奉批飭審遵提覆鞫據供前情不諱逃後詰無另犯不法及知情容留人家配所鄉約亦無賄縱情弊案無遁飾查例載充軍常犯至配脫逃初次枷號一箇月本犯近邊者以次遞加又蠹役詐贓十兩以上者

